

# CARNAVAL UNDA BO TA (3)

Pa: Juby Naar

Carnaval ta tras di lomba. Nos a zundra otro, pleita, braza otro, sunchi otro, goza bon, goza malo, bebe na cantidad, come na cantidad, critica otro bon y malo, pero ta bira momento pa cuminsa traha.

A bira tempo pa SAC tuma resto di e luna aki pa sosega curpa y cerebro, pa asina cu maart drenta, cuminsa traha.

## CARNAVAL 40

Carnaval 40 ta den porta, no warda te final y cuminsa prepara e di 8 lustro di awor. Esaki ta conta pa tanto SAC, gruponan musical y gruponan di carnaval.

SAC cu Milo Croes na cabez (no ta asina asina por baha Milo, y no ta asina asina Milo tin cu baha of mester baha. Ban dune oportunidad pa organiza Nr. 40 manera mester ta, pero ORGANIZA) y ora e no tey, cu otro na cabez, mester traha henter aña cuminzando for di maart caba.

A bira tempo cu e reformation mester drenta na vigor. A bira tempo pa revisa e organizacion SAC, y su Statutonnan y Reglamentonan di tur actividad.

A bira tempo pa elimina

actividadnan di perdida y bin cu actividadnan atractivo pa trece entrada aden pa SAC por traha sin perdida.

Carnaval 40 mester bira e showcase di carnaval di Aruba y promove durante henter aña localmente y den exterior y for di awor caba.

## BIRA SERIO

## CU CONCURSONAN

Pa eleccion di Prins y Panchito, laga un comision sinta na mesa, organiza e evento aki cu reglamentonan y stipulacionnan y mantene na esaki sin ningun cambio. Haci e actividad algo serio organiza y no con cu ta manera tur aña.

## ELECCION DI REINA

Laga distritonan organiza nan eleccion di reinanan durante aña pa dia cu carnaval cuminsa ya tur reina ta conoci y ta falta solamente e eleccion di reina di carnaval, tanto inantil, juvenil y grandi.

E fin di simannan di eleccion di reina henter fin di siman, aki y aya, por ser usa pa actividadnan nobo. (no lubida cu otro aña tempo ta mas cortico cu e aña aki).

A mira cambionan den eleccionnan y lo ta bon pa stipula concretamente e reglamentonan pa e diferente concursosnan durante eleccion di reina pa esaki no sali for di man y mantene e stipulacionnan estrictamente.

## CALYPSO - TUMBA

Mester cuminsa organiza e concurso di calypso y di tumba for di awor. Bandanan y cantantenan mester cuminsa prepara for di awor pa dia di inscripcion tur cos ta cla caba. Bini cu reglamentonan y stipulacionnan concreto for di awor. Acuerdonan entre SAC y ASOMA y ASOMA y su miembronan mester wordo studia, debati, y firma for di awor y mantene na esaki.

E polemica SAC - ASOMA di tur aña mester ta tras di lomba pa semper.

SAC mester ta cla cu tur dato di calypso y roadmarch for di november caba y sin permiti cambionan despues.

## PREMIONAN

Durante fin di siman por a tende atrobe comentarionan riba premionan y tipo di premionan. SAC y ASOMA mester yega na acuerdo riba premionan atractivo pa ganadornan di Calypso, Roadmarch y Tumba. Mester yega na acuerdo riba e manera cu ta yega na fondo pa esaki.

Pa gruponan di carnaval, ta yega momento pa duna e gruponan premio cu ta vale la pena. SAC y Lideranan di grupo mester sinta na mesa delibera riba esaki y busca manera pa yega na premio mas atractivo.

E concursosnan y eleccionnan di Carnaval ta e eventonan mas grandi di nos isla y cu ta hala mas tanto publico mientras cu nan ta tambe (cu excepcion di gruponan) e eventonan caminda gastonan di mas grandi ta ser haci. E ganadornan siquiere por saca gran parti di nan gasto afo como premio ricibi en efectivo.

## RECAUDACION

ASOMA cu colaboracion di bandanan musical, mester por organiza dos of tres actividad

Sigui lesa pag. 31





# CARNAVAL UNDA BO TA (3)

*Pa: Juby Naar*

*Cont pag. 30*

durante aña pa recauda fondo pa solamente bandanan musical pa asina por mantene e tarifa pa bandanan toca pa gruponan, mas abao.

SAC mester por organizacion actividadnan durante aña y durante carnaval pa yuda bandanan musical cu nan gastonan pa e diferente paradanan fuera di e dos grandinan.

SAC hunto cu Un Comision di gruponan di carnaval, por organiza actividadnan pa haya fondo pa premionan mas atractivo den carnaval.

Den temporada di carnaval SAC mester por bin cu actividadnan atractivo pa haya entrada y mas fondo.

## GRUPONAN

Ta bira tempo pa Gruponan y SAC sinta na mesa y delibera riba asunto di ruta, y asunto di premionan y manera di premiacion di ganadornan di parada di carnaval. Sinta na mesa y bini cu stipulacionnan nobo riba juzgamento di gruponan y premiacion di gruponan.

Gruponan hunto cu SAC mester delibera riba e sorto di premio cu ta ser duna yasina

haci e competencia mas fuerte y cu tur hende por prepara nan grupo, nan carosa, nan pieza individual, comico de comercial mihor y pa por cay den premiacion pero cu competencia..

## RUTANAN

Ta bira tempo atrobé pa sinta na mesa y delibera riba e ruta. Ayera atrobé por a tende reclamacion riba ruta. Gruponan y SAC mester sinta na mesa (hunto cu polis si ta necesario) y stipula ruta, orario di parada, reglamentacionnan etc.

## ACTIVIDADNAN NOBO

Stipula dos of tres fecha, cu un siman di anticipacion, caminda tur esnan cu tin idea riba actividadnan nobo, por haya oportunidad pa reuni cu SAC riba esakinan, y presenta tur cos riba papel y documenta durante e reunionnan. Asina lo stop di tende di cu SAC ta hinca ideanan den laatchi, of cu nunca e ideanan no a yega na SAC

etc.

Si tin ideanan rendable pa SAC of atractivo pa SAC y publico, traha riba nan y introduci nan maske ta como prueba. Si e no resulta un aña, traha riba dje, mehore of elimine.

## PROMOCION

Asina cu actividadnan di carnaval ta cla pa wordoorganiza, mester cuminsa cu un promocion intenso di cada un y si ta posible durante aña mes cu nan ta den desarrollo di preparacion. Laga publico sa kico ta pasando y con e desarrollo ta bayendo y asina prepara ademas cu concientizacion, estimulacion y promocion, e publico pa e celebracion grandi di e di 8 lustro.

## KENDE BO TA?

Pa termina e serie di "Carnaval unda bo ta?" Mi kier termina cu e pregunta cu kizas den SAC y kizas pafo di SAC tin lector ta puntra y esey ta "kende Juby ta", pa skirbi tur e cosnan aki?"

Mi no ta ningun experto den asuntunan di carnaval. Expertonan ta Milo Croes, y su hendenan cu aña tras aña ta traha cu alma y culpa durante e temporada di carnaval.

Lidernan di grupo cu aña tras aña ta sacrifica lunanan pa nan grupo etc. Mi skirbimento ta basa riba locual mi a pasa aden.

For di 1948 como mucha di apenas 5 aña mi tabata mascotte den e prome parada di carnaval den Lago Heights, saliendo di Bachelor's Quarters na Lago Heights, pa Lago Heights Club y baha pa San nicolas y bolbe anochi pa club.

Ma pasa den steelbandnan como tocador di drum di mas pisa (bass) na carganta varios aña te na e bari mas liviano (first pan). A toca den diferente steelband grandi y cu gruponan grandi. Mi a pasa den trahamento di bleki di steelband di comienzo te fin, den trahamento di disfraz, organiza gruponan di carnaval y traha den disfraz di gruponan y traha carosanan. Tabata na cuna di Comision Juvenil di Carnaval. Nunca



mi tabata miembro di SAC ni di CCCA cu tabata prome cu SAC.

## COLABORADOR

For di 1975, menos e aña aki, mi tabata un colaborador di SAC, y manera un hende a yega di bisa "e unico outsider na saya di SAC" y cu a experiencia tur bon y tur malo di SAC den tur e añanan cu a pasa..

E "unico outsider" cu a presencia tur bon y tur malo di ASOMA hayando invitacion special pa atende nan reunionnan principalmente riba conflictonan carnavalesco y cu ta na altura di tur movecion di concurso di Calypso y Roadmarch y di tumba y 18 aña a presenta nan tambe riba escenario.

For di 75 hunto cu Ito Tromp y despues sin Ito, a traha proclamacionnan pa Prins y Panchito te cu aña pasa. Pa 13 aña a juzga paradanan y pa diez aña como president di jurado conociendo tur bon y malo di kico a tuma lugar kico ta tumando lugar y kizas por bisa algo di kico por haci.

Den corantnan for di 1977, POPO ta informa skirbi pa mi persona tabata e prome columna carnavalesco y des-

pues di varios aña tur otro corant a cuminsa tambe cu columnanan di carnaval, mescos cu POPITO tabata e prome programa radial carnavalesco y despues a bini e programanan radial na e varios emisoranan awendia. Pesey kizas cu e serie di articulonnan "Carnaval unda bo Ta?" mi por a contribui algo y kizas siquiera un di e sugerencianan por wordo aproba y traha ariba pa carnaval 40 y futuro di carnaval.



**J.R. REAL ESTATE N.V.**

**CAS PA HUUR  
SOLICITA**

Pa un importante cliente di nos compania

**Fis 1500,- te cu Fis 200,-**

pa luna yama awe mes pa un oferta

**Nos servicio ta \*\*gratis\*\*  
pa doño di cas**



**38254 - 38512**

